



"Tenge Bank" ATBda jismoniy
shaxslarga xizmat ko'rsatish bo'yicha
Universal shartnomaga

OMMAVIY OFERTA
"TENGE BANK" ATBDA JISMONIY SHAXSLARNING OMONAT
OPERATSIYALARINI AMALGA OSHIRISHNING ASOSIY
SHARTLARI VA TARTIBIGA QO'SHILISH

1. UMUMIY QOIDALAR

- 1.1. Ushbu Ommaviy oferta (bundan keyin matnda - Oferta) "Tenge Bank" ATBda jismoniy shaxslarga xizmat ko'rsatish bo'yicha Universal shartnomaning (bundan keyin matnda - Universal shartnoma) ajralmas qismi hisoblanadi va "Tenge Bank" ATBning (bundan keyin matnda - Bank) O'zbekiston Respublikasi Fuqarolik kodeksining 360 va 369-moddalariga muvofiq, jismoniy shaxslarning Bankdagi omonat operatsiyalarini amalga oshirish shartlari va tartibiga qo'shilishi, shuningdek, Mijozga ushbu Ofertaning 1.4-bandida ko'rsatilgan xizmatlarni taqdim etish bo'yicha rasmiy taklifidir.
- 1.2. Ofertada omonat operatsiyalari bo'yicha bank xizmatlarining asosiy shartlari keltirilgan bo'lib, ular Mijoz va Bankning (bundan keyin matnda - Tomonlar) huquq va majburiyatlari, javobgarligi, vositachilik haqini to'lash tartibi va boshqa shartlarni o'z ichiga oladi. Bu shartlarga rioya qilish Tomonlar o'rtasidagi o'zaro munosabatlarning asosiy tamoyili hisoblanadi va Shartnoma/Ariza-Ofertaning ajralmas qismi bo'ladi.
- 1.3. Ushbu Oferta, shuningdek, Mijozga omonat operatsiyalarini ko'rsatish tartibini, ularni amalga oshirish va tugatish shartlarini belgilovchi hujjat hisoblanadi. Oferta muayyan bank xizmatlarini olish uchun Mijoz tomonidan belgilangan shaklda rasmiylashtirilgan hujjatning ajralmas qismidir.
- 1.4. Ushbu Oferta doirasida Mijoz Bankda jismoniy shaxslar uchun mavjud bo'lgan quyidagi xizmatlardan foydalanish huquqiga ega:
 - milliy valyutada talab qilib olinguncha saqlanadigan omonat hisobvaraqlari ochish va yuritish;
 - chet el valyutasida talab qilib olinguncha saqlanadigan omonat hisobvaraqlari ochish va yuritish;
 - muddatli va jamg'arma omonatlariga xizmat ko'rsatish;
 - yuqorida ko'rsatilgan omonatlardan foydalangan holda amalga oshiriladigan boshqa turdagi bank xizmatlari;
- 1.5. Ushbu ofertani qabul qilish orqali Mijoz Bankda mavjud bo'lgan barcha xizmatlardan foydalanish majburiyatini olmaydi, balki faqat o'z xohishi yoki ehtiyojiga ko'ra foydalanadi.
- 1.6. Ushbu Ofertadan Mijozga (bundan buyon matnda - Omonatchi) Bank bo'linmasida yoki masofaviy bank xizmati (bundan buyon matnda - MBX) orqali xizmat ko'rsatish uchun foydalanish mumkin.
- 1.7. Omonat hisobini ochish to'g'risidagi arizani (mazkur ofertaga 1-shakl va 2-shakl) imzolash yoki ushbu ommaviy ofertani MBX orqali qabul qilish orqali Omonatchi ushbu oferta, Universal shartnoma va Bankning amaldagi tariflari bilan tanishganligini va ularga roziligini tasdiqlaydi. Bu esa Oferta va Universal shartnomaning barcha shartlarini so'zsiz qabul qilishini (akseptlashini) anglatadi.
- 1.8. Ofertaning tuzilganligini tasdiqlash va/yoki omonatchining talab qilib olinguncha saqlanadigan omonatlari, muddatli yoki jamg'arma omonatlari (bundan keyin - Omonat) hisobvaraqlariga masofaviy bank xizmatlari ("Shaxsiy kabinet", Bankning mobil ilovasi va boshqalar) orqali pul mablag'larini kiritish omonat hisobvarag'iga pul mablag'larini o'tkazish operatsiyasini amalga oshirish va operatsiya bajarilganligi haqida SMS-xabarnoma olish bilan tasdiqlanadi.
- 1.9. Bank bo'linmasida rasmiylashtirilgan Omonatga mablag'lar kiritilganligini tasdiqlash uchun kirim orderi/memorial order xizmat qiladi. Mijozning xohishiga ko'ra, qo'shimcha tasdiq sifatida jamg'arma blankasi ham beriladi.
- 1.10. Jamg'arma blankasi - bu operatsiyalarni yozma ravishda tasdiqlovchi hujjat bo'lib, u Bank tomonidan omonat bo'yicha bajarilgan va omonat bo'yicha qabul qilingan majburiyatlarni kafolatlaydi.

Jamg'arma blankasi omonat daftarchasiga tenglashtiriladi.

1.11. Omonatchi omonat qoldig'i, kirim-chiqim operatsiyalari, omonat muddatining tugashi to'g'risidagi ma'lumotlarni, shuningdek omonat bo'yicha boshqa zarur axborotni SMS-xabar berish xizmati, Bankning rasmiy veb-sayti orqali ochilgan shaxsiy kabinet yoki Bankning mobil ilovasi orqali olishi mumkin.

1.12. Omonatchi Bank taklif etgan tanlangan Omonatga pul mablag'larini kiritadi, Bank esa Omonat summasini qabul qilish va qaytarish, shuningdek, Omonat shartlariga muvofiq, agar mavjud bo'lsa, foizlarni to'lash majburiyatini oladi.

1.13. Bank tomonidan omonatga qabul qilingan pul mablag'larining qaytarilishi O'zbekiston Respublikasi Banklardagi omonatlarni kafolatlash agentligi tomonidan 18.02.2025-yildagi "Banklardagi omonatlarni himoyalash kafolatlari to'g'risida"gi O'RQ-1031-sonli Qonunga muvofiq kafolatlanadi.

1.14. Kafolatli holat yuz bergan sanada kafolat obyektlari egasi bo'lgan omonatchilarning tugatilayotgan bankka nisbatan talab qilish huquqi, Agentlik tomonidan kompensatsiyalar amalda to'langanidan qat'i nazar, kafolatlangan omonatlar summasiga teng miqdorda Agentlikka o'tadi. Agentlikning tugatilayotgan bankka nisbatan talablari qonun hujjatlarida belgilangan navbatga muvofiq qondiriladi.

1.15. Omonatchi Bank taklif etadigan Omonat turini mustaqil ravishda tanlaydi va uni Bank bo'linmasida yoki Masofaviy bank xizmati (MBX) orqali ochishi mumkin.

1.16. Omonatchi barcha amaldagi omonatlarning shartlari bilan Bankda tanishishi mumkin. Bu ma'lumotlar ochiq joyda, MBX orqali, shuningdek Bank veb-saytida joylashtirilgan: www.tengebank.uz

2. TALAB QILIB OLINGUNCHA SAQLANADIGAN OMONATLAR BO'YICHA PUL MABLAG'LARINI JOYLASHTIRISH VA QAYTARISH SHARTLARI

2.1. Talab qilib olinguncha saqlanadigan omonatlar bo'yicha ochilgan hisobvaraqlar muddatsiz hisoblanadi va omonatchining birinchi talabi bilan pul mablag'lari (to'liq yoki qisman) berilishi sharti bilan ochiladi.

2.2. Bank talab qilib olinguncha saqlanadigan omonatning eng kam va eng ko'p miqdorini belgilamagan.

2.3. Talab qilib olinguncha saqlanadigan omonatlarda pul mablag'lari foizlar hisoblanmasdan saqlanadi.

2.4. Qo'shimcha to'lovlar va qisman yechib olish imkoniyati mavjud bo'lib, miqdori cheklanmagan.

2.5. Talab qilib olinguncha saqlanadigan omonatga pul mablag'larini joylashtirish O'zbekiston Respublikasi qonunchiligida ko'zda tutilgan usullarda naqd va naqdsiz shaklda amalga oshiriladi.

2.6. Talab qilib olinguncha saqlanadigan omonatlar shaxsan bank bo'limida yoki masofaviy bank xizmatlari tizimlari orqali ochiladi.

2.7. Talab qilib olinguncha saqlanadigan omonatlar shaxsan kelganda O'zbekiston Respublikasining amaldagi qonunchiligiga muvofiq shaxsni tasdiqlovchi hujjat taqdim etilishi bilan ochiladi. Buning uchun omonatchi bank belgilagan shakl va tartibda, ushbu ofertaga havola qilib ariza topshiradi. Yozma shartnoma tuzish talab qilinmaydi, oferta topshirilgan arizaning ajralmas qismi hisoblanadi.

2.8. Omonatchi arizani imzolash orqali ushbu oferta bilan tanishganligini va unga so'zsiz roziligini tasdiqlaydi.

2.9. Masofaviy bank xizmatlari orqali talab qilib olinguncha omonatlarni ochish "Tenge Bank" ATBda jismoniy shaxslarga xizmat ko'rsatish bo'yicha Universal shartnomaga qo'shilish to'g'risidagi ommaviy ofertani qabul qilish asosida amalga oshiriladi. Bu omonat va oferta shartlariga so'zsiz rozilikni anglatadi.

2.10. Omonatchining talab qilib olinguncha saqlanadigan omonatdan pul mablag'larini o'tkazish to'g'risidagi farmoyishini bajarish faqat O'zbekiston Respublikasining amaldagi qonunchiligiga muvofiq omonatchining shaxsini tasdiqlovchi hujjat taqdim etilgandagina amalga oshiriladi. Omonatdan talab qilib olinguncha pul mablag'larini masofaviy bank xizmatlari tizimi orqali o'tkazish esa tizimda tegishli so'rov yuborish orqali bajariladi.

2.11. Omonatchining xohishiga ko'ra, talab qilib olinguncha saqlanadigan omonat istalgan vaqtda Bankka ariza topshirish yoki Masofaviy bank xizmati tizimi orqali so'rov yuborish yo'li bilan yopilishi mumkin.

2.12. Agar talab qilib olinguncha saqlanadigan omonat bo'yicha 12 oy davomida qoldiq va operatsiyalar mavjud bo'lmasa, Bank tegishli arizani rasmiylashtirmasdan hisobvaraqni avtomatik ravishda yopishga haqli.

2.13. 12 oy davomida qoldiqqa ega bo'lgan, ammo operatsiyalar amalga oshirilmagan omonatlar, Omonatchiga SMS-xabar yuborilgandan so'ng, uyqu holatidagi hisobvaraqa o'tkaziladi. Pul mablag'lari o'tkazilgach, omonat hisobvarag'i yopiladi va uyqu holatidagi hisobvaraqdan chiqim operatsiyalarini amalga oshirish taqiqlanadi. Agar omonatchi uyqu holatidagi hisobvaraqdagi pul mablag'larini olishni xohlasa, u taqiqni bekor qilish va mablag'larni yangi omonat hisobvarag'iga o'tkazish to'g'risida ariza yoki so'rov taqdim etishi lozim.

2.14. Omonatning asosiy summasini qisman yechib olish yoki butun summasini muddatidan oldin qaytarish Masofaviy bank xizmati tizimi orqali ATB "Tenge Bank"da ochilgan hisobvaraqa yoki bank kartasiga amalga oshiriladi. Bunda keyinchalik pul mablag'larini boshqa banklardagi hisobvaraqlarga yoki bank kartalariga o'tkazish Bankning amaldagi tariflari asosida amalga oshiriladi.

3. JAMG'ARMA/MUDDATLI OMONATLAR BO'YICHA PUL MABLAG'LARINI JOYLASHTIRISH VA QAYTARISH SHARTLARI

3.1. Muddatli va jamg'arma omonatlarga pul mablag'larini joylashtirish O'zbekiston Respublikasi qonunchiligida nazarda tutilgan usullarda, naqd va naqd pulsiz shaklda, hamda muayyan omonat shartlariga muvofiq amalga oshiriladi.

3.2. Omonat shaxsan kelib rasmiylashtirilganda, Omonatchi O'zbekiston Respublikasining amaldagi qonunchiligiga muvofiq shaxsini tasdiqlovchi hujjatni va Bank belgilagan shakldagi arizani taqdim etadi. Muddatli va jamg'arma Omonatlari bo'yicha tomonlar Omonatning barcha muhim shartlari ko'rsatilgan shartnoma tuzadilar. Tomonlarning huquq va majburiyatlari, shuningdek, javobgarligi tuzilgan shartnomaning qo'shimchasi va ajralmas qismi hisoblangan ushbu Ofertada ko'rsatilgan. Omonatchining rasmiylashtirilgan shartnomadagi imzosi ushbu Oferta bilan tanishganligini va so'zsiz roziligini anglatadi.

3.3. Masofaviy bank xizmati orqali ochilgan omonatlar ofertani qabul qilish asosida ochiladi, bu Mijozning Bank tariflari va Bank taklif etayotgan shartlarga to'liq roziligini bildiradi.

3.4. Omonatlar bo'yicha operatsiyalar Masofaviy bank xizmati tizimi orqali quyidagi hollarda amalga oshirilmaydi:

- Agar Masofaviy bank xizmati tizimlarining ishi operatsiyani o'tkazish jarayoni ishtirokchilaridan birining texnik sabablarga ko'ra vaqtincha ishlamayotgan bo'lsa;

- Bankning operatsion kunini ochish/yopish jarayonida.

3.5. Omonat bo'yicha foizlar O'zbekiston Respublikasining amaldagi qonunchiligiga muvofiq har kuni hisoblanadi. Bunda, bir yildagi kunlarning hisobiy soni 365 kun deb olinadi.

3.6. Omonat ochilganda foizlarni hisoblash har kuni, pul mablag'lari Omonatchining hisobvarag'iga o'tkazilgan kunning ertasidan boshlab, ular to'liq qaytarilishi yoki hisobvaraqdan boshqa asoslarga ko'ra to'liq hisobdan chiqarilishidan oldingi kungacha amalga oshiriladi.

3.7. Omonatga keyingi qo'shimcha badal kiritilganda, foizlar omonatchining hisobvarag'iga pul mablag'lari o'tkazilgan/tushgan kundan keyingi kundan boshlab har kuni hisoblanadi.

3.8. Ishlamaydigan/bayram kunlarida Omonat hisobvarag'iga pul mablag'lari o'tkazilgan taqdirda, ishlamaydigan kundan keyingi birinchi ish kuni o'tkazilgan kun deb hisoblanadi. Bunda foizlar MBX tizimida Omonatni to'ldirish bo'yicha operatsiya amalga oshirilgan kundan keyingi kundan boshlab hisoblanadi.

3.9. Omonatga pul mablag'lari operatsiya kuni tugagandan/yopilgandan so'ng kelib tushgan taqdirda, keyingi operatsiya kuni hisobvaraqa o'tkazilgan kun deb hisoblanadi. Bunda foizlar Omonatchining hisobvarag'iga pul mablag'lari o'tkazilgan kundan keyingi kundan boshlab hisoblanadi.

3.10. Omonatning asosiy summasini qisman yechib olish Bankda ochilgan hisobvaraqa yoki bank kartasiga amalga oshiriladi. Bunda foizlar kunlik to'ldirish summalarini hisobga olmagan holda omonatning haqiqiy qoldig'iga hisoblanadi. Foizlar omonat bo'yicha kun davomidagi qoldiqning eng kam summasiga hisoblanadi. Bunda omonat bo'yicha qoldiqning eng kam summasi omonatga qo'shimchalarni hisobga olmagan holda kun davomida omonatdan yechib olingan barcha summalarni ayirib tashlangandan keyingi qoldiqning eng kam summasi hisoblanadi.

3.11. Bank Omonatchining hisobvarag'iga taqiq qo'yilishi natijasida ushbu hisobvaraqdagi mavjud pul

mablag'laridan foydalana olmagan davrda foizlar hisoblanmaydi.

3.12. Omonatlar bo'yicha foizlarni to'lash Omonat shartlariga muvofiq amalga oshiriladi, foizlarni to'lash tartibi tuzilgan shartnomada yoki qabul qilingan taklifnomada belgilanadi.

3.13. Agar muddatli omonatni qaytarish sanasi (onlayn) dam olish yoki bayram kuniga to'g'ri kelsa, omonatni qaytarish o'sha kuni amalga oshiriladi. Bunda foizlar omonatchiga qaytarilishidan oldingi kungacha hisoblanadi.

3.14. Omonatni muddatidan oldin yopish Omonat shartlari asosida amalga oshiriladi va tuzilgan shartnomada yoki qabul qilingan taklifnomada ko'rsatiladi, faqat Bankda ochilgan hisobvaraqa yoki bank kartasiga o'tkaziladi.

3.15. Omonat hisobvarag'i Omonat pul mablag'lari o'tkazilgandan so'ng, Omonatning saqlash muddati tugaganda yoki Omonat muddatidan oldin yopilganda avtomatik ravishda yopiladi.

3.16. Masofaviy bank xizmatlari tizimlari orqali boshqariladigan jismoniy shaxslarning omonatlaridagi pul mablag'lari Bank kassasi orqali naqd pulda berilmaydi.

4. OMONATCHINING HUQUQ VA MAJBURIYATLARI

4.1. Ushbu Ofertani aksept qilish (rozi bo'lish) orqali, Omonatchi Oferta bilan tanishganini va unga to'liq roziligini tasdiqlaydi, shuningdek, barcha talablar va shartlarga rioya qilish majburiyatini oladi, hamda Bankning Omonatchi uchun zarur bo'lgan valyutada tegishli hisobvaraqlar ochishiga rozilik beradi.

4.2. Omonat ochilganda, Omonatchi Bank yangiliklarini, shuningdek, operatsiyalar bo'yicha ma'lumotlarni yuqorida ko'rsatilgan mobil aloqa raqamiga SMS xabarlar ko'rinishida va O'zbekiston Respublikasi qonunchiligiga zid bo'lmagan boshqa usullar bilan yuborishi mumkinligi haqida xabardor qilingan va bunga rozilik bildirgan.

4.3. Ushbu Oferta orqali Omonatchi o'zining barcha shaxsiy ma'lumotlarini yig'ish, qayta ishlash, to'plash, saqlash, o'zgartirish, to'ldirish va foydalanishga rozilik beradi. Bu bank xizmatlarini olish uchun zarur bo'lgan, ma'lumotlarni olganlik faktini tasdiqlovchi har qanday shaklda bo'lishi mumkin. Shuningdek, Omonatchi hujjatlarni suratga olish, skanerlash va olingan tasvirdan identifikatsiya qilish hamda Bankda xizmatlar olish maqsadida foydalanishga rozi bo'ladi. Bularning barchasi Bank uchun maqbul shaklda amalga oshiriladi.

4.3.1. Bank tomonidan omonatga pul mablag'lari xato o'tkazilgan taqdirda, Mijoz Bankka Mijozning qo'shimcha ko'rsatmalarisiz omonatdan xato o'tkazilgan pul mablag'larini va/yoki omonat summasiga ortiqcha hisoblangan/to'langan foizlarni yechib olish huquqini beradi va bunga rozilik bildiradi (oldindan berilgan aksept).

4.4. Omonatchi quyidagi huquqlarga ega:

4.4.1. Pul mablag'lari Omonatga kiritilgandan so'ng, belgilangan tartibda tasdiqnoma olish;

4.4.2. Omonat bo'yicha operatsiyalar to'g'risidagi ma'lumotlarni SMS-xabarlar va/yoki Masofaviy bank xizmatlari (Bankning mobil ilovasi, Bankning rasmiy veb-saytida joylashgan shaxsiy kabinet - www.tengebank.uz) orqali olish;

4.4.3. Omonat bo'yicha bank xizmatlarini, shu jumladan, Masofaviy bank xizmatlari orqali amalga oshirish;

4.4.4. Omonat hisobvarag'i bo'yicha belgilangan tartibda ko'chirmalar olish;

4.4.5. O'zbekiston Respublikasi qonunchiligiga muvofiq Omonatni shaxsan tasarruf etish yoki Omonatni tasarruf etish huquqini uchinchi shaxslarga berish;

4.4.6. O'zbekiston Respublikasining amaldagi qonunchiligiga muvofiq Omonatchining boshqa huquqlaridan foydalanish.

4.4.7. Omonat summasi va hisoblangan foizlarni, mavjud bo'lgan taqdirda, erkin tasarruf etish;

4.4.8. Ushbu Ofertada belgilangan tartibda Omonat muddati tugagandan so'ng, shuningdek muddatidan oldin Omonat summasini talab qilish;

4.4.9. O'zbekiston Respublikasining amaldagi qonunchiligiga muvofiq Omonatchining boshqa huquqlaridan foydalanish.

4.5. Omonatchining majburiyatlari:

4.5.1. Omonat shartlari va ushbu Oferta bilan tanishish;

- 4.5.2. Ushbu Oferta shartlariga rioya qilish;
- 4.5.3. Bankka faqat to'g'ri, aniq va ishonchli ma'lumotlarni taqdim etish;
- 4.5.4. Hisobvaraqlar bo'yicha operatsiyalarni O'zbekiston Respublikasining amaldagi qonun hujjatlariga, O'zbekiston Respublikasi Markaziy banki va boshqa vakolatli organlarning me'yoriy hujjatlariga qat'iy muvofiq ravishda amalga oshirish;
- 4.5.5. Masofaviy bank xizmati (MBX) orqali Omonat ochishda Bankning MBX foydalanuvchisi bo'lish, qonunda belgilangan tartibda raqamli identifikatsiya va verifikatsiyadan o'tish hamda Omonatning dastlabki summasini (badalini) kiritish uchun bank kartasi hisobvarag'ida yetarli mablag'ga ega bo'lish;
- 4.5.6. Hisobvaraqlarga xato o'tkazilgan va/yoki hisobvaraqlardan noto'g'ri hisobdan chiqarilgan mablag'lar aniqlangan taqdirda, Bu haqda darhol Bankka xabar berish va hisobvaraqlardan tadbirkorlik faoliyati bilan bog'liq operatsiyalarni amalga oshirish uchun foydalanmaslik;
- 4.5.7. Operatsiya amalga oshirilgan kundagi Bank tariflarida nazarda tutilgan Omonat bo'yicha bank operatsiyalari uchun belgilangan xizmat haqlarini to'lash;
- 4.5.8. MBX orqali Omonat mablag'larini tasarruf etish huquqini beruvchi ma'lumotlar (login, parollar, PIN-kodlar) maxfiyligini ta'minlash va ularni uchinchi shaxslarga bermaslik;
- 4.5.9. MBX tizimiga o'z login va paroli bilan ruxsatsiz kirishning har qanday holati va/yoki xavfsizlikning har qanday buzilishi haqida Bankni darhol xabardor qilish;
- 4.5.10. O'zbekiston Respublikasi qonunchiligiga muvofiq Omonatni shaxsan tasarruf etish yoki notarial tasdiqlangan ishonchnoma orqali Omonatni tasarruf etish huquqini uchinchi shaxslarga berish;
- 4.5.11. Yashash joyi, ish joyi, familiyasi yoki ismi o'zgarganligi, shuningdek Omonatchining ushbu Oferta bo'yicha o'z majburiyatlarini bajarishiga ta'sir qilishi mumkin bo'lgan boshqa holatlar haqida 3 kalendar kuni ichida Bankka xabar berish;
- 4.5.12. Jinoiy faoliyatdan olingan daromadlarni legallashtirish, terrorizmni moliyalashtirish va ommaviy qirg'in qurollarini tarqatishni moliyalashtirishga qarshi kurashish bo'yicha xalqaro va milliy qonun hujjatlari, shuningdek xalqaro iqtisodiy sanksiyalar talablariga rioya qilish;
- 4.5.13. O'zbekiston Respublikasining amaldagi qonunchiligiga muvofiq boshqa majburiyatlarni bajarish;
- 4.6. Omonatchi vafot etgan taqdirda, uning barcha huquq va majburiyatlari O'zbekiston Respublikasi qonun hujjatlarida belgilangan tartibda merosxo'rlariga o'tadi;

5. BANKNING HUQUQ VA MAJBURIYATLARI

5.1. Bank quyidagi huquqlarga ega:

- 5.1.1. Omonatchi Omonat summasini muddatidan oldin talab qilganda, Omonat shartlariga muvofiq uni qaytarish;
- 5.1.2. Tegishli davlat organlarining ijro hujjatlari kelib tushgan taqdirda, Omonatchi e'tirozlaridan qat'i nazar, O'zbekiston Respublikasi qonunchiligida belgilangan tartibda choralar ko'rish (pul mablag'lariga taqiq qo'yish, pul mablag'larini so'rovsiz hisobdan chiqarish, hisob bo'yicha amallarni to'xtatib qo'yish va boshqalar);
- 5.1.3. Omonatchining hisobvaraqlardagi pul mablag'lari bo'yicha bank xizmatlari uchun, shu jumladan Omonatchining qo'shimcha topshirig'isiz (so'rovsiz tartibda) Bankning belgilangan tariflariga muvofiq vositachilik haqini undirish;
- 5.1.4. Jinoiy faoliyatdan olingan daromadlarni qonuniylashtirish va ommaviy qirg'in qurollarini tarqatishni moliyalashtirishga qarshi kurashish, shuningdek xalqaro iqtisodiy sanksiyalar talablariga rioya etish maqsadida Bank Omonatchidan uni aniqlash imkonini beruvchi va hisobvaraqlar bo'yicha amalga oshirilayotgan amallarning qonuniyligini tasdiqlovchi ma'lumotlar hamda hujjatlarni talab qilish huquqiga ega;
- 5.1.5. O'zbekiston Respublikasining amaldagi qonunchiligiga, xususan, jinoiy faoliyatdan olingan daromadlarni qonuniylashtirish va ommaviy qirg'in qurollarini tarqatishni moliyalashtirishga qarshi kurashish to'g'risidagi qonunchilikka, shuningdek xalqaro iqtisodiy sanksiyalar talablariga rioya etilishini ta'minlash maqsadida hisobvaraqlar bo'yicha amallarni to'xtatib qo'yish yoki ularni

- bajarishni rad etish;
- 5.1.6. Xalqaro iqtisodiy sanksiyalar talablari buzilishiga shubha tug'ilganda, majburiyatlarni bajarishdan to'liq yoki qisman bir tomonlama voz kechish, shuningdek, hisobvaraqlar bo'yicha operatsiyalarni to'xtatib qo'yish;
- 5.1.7. Bank yangiliklari, Bankning axborot, reklama materiallari va tijorat takliflarini, shuningdek, Omonatchining hisobvarag'idan amalga oshirilgan operatsiyalar haqidagi ma'lumotlarni pochta jo'natmalari, elektron aloqa vositalari, SMS xabarlar orqali Bank tizimida Omonatchi ko'rsatgan manzillar/telefon raqamlariga yoki boshqa usulda yuborish. Omonatchi yuborilgan xat-xabarlarining uchinchi shaxslarga ma'lum bo'lishi bilan bog'liq barcha xatarlarni o'z zimmasiga oladi;
- 5.1.8. Qoldig'i mavjud va 12 oy davomida operatsiyalar amalga oshirilmagan omonatlarni quyidagiga o'tkazish: Bankning ichki me'yoriy hujjatlariga muvofiq, mijoz tomonidan bankka tegishli topshiriq (ariza/so'rov) berilgunga qadar xarajat operatsiyalarini amalga oshirishga taqiq o'rnatilgan uyqudagi hisobvaraqlar;
- 5.1.9. Operatsiya summasiga cheklov o'rnatish;
- 5.1.10. Operatsiyalar mijozning KYC so'rovnomasida ko'rsatilgan ma'lumotlarga mos kelmasa, operatsiyalarni rad etish, xizmat ko'rsatishni rad etish va qonun hujjatlariga muvofiq ushbu Ofertani bir tomonlama bekor qilish;
- 5.1.11. Mijozning operatsiyasini o'rganish maqsadida qo'shimcha ma'lumot so'rash;
- 5.1.12. Agar Mijoz yoki uning operatsiyasi xalqaro iqtisodiy sanksiyalar ta'siri ostida bo'lsa va (yoki) bunday xavf mavjud bo'lsa, operatsiyalarni amalga oshirishni rad etish yoki Ofertaning amal qilishini bir tomonlama to'xtatish;
- 5.1.13. Mijozning hisobvaraqlari va operatsiyalari bo'yicha bank sirini saqlash;
- 5.1.14. Bank O'zbekiston Respublikasi qonunchiligiga muvofiq Mijozning hisobvaraqlari faoliyatini to'xtatib turish huquqiga ega;
- 5.1.15. O'zbekiston Respublikasining amaldagi qonunchiligiga muvofiq boshqa huquqlardan foydalanish.
- 5.2. Bank quyidagilarga majbur:**
- 5.2.1. Bankning amaldagi va taklif etilayotgan omonatlari shartlarini o'zining rasmiy veb-saytida joylashtirish - www.tengebank.uz;
- 5.2.2. Omonatchidan kerakli summani, shuningdek, agar Omonat shartlarida ko'zda tutilgan bo'lsa, qo'shimcha badallarni qabul qilish va uning Omonatiga o'tkazish;
- 5.2.3. Omonat, tuzilgan Shartnoma/Oferta, shuningdek, ushbu Oferta shartlariga muvofiq foizlarni hisoblash va to'lash;
- 5.2.4. Omonat muddati tugagach, Shartnoma/Oferta asosida qo'shimcha badallar bilan birga (agar mavjud bo'lsa) Omonat summasini qaytarish;
- 5.2.5. Hisobvaraqlardagi mablag'larning saqlanishi va daxlsizligini ta'minlash. Hisobvaraqlardagi mablag'larni xatlash yoki hisobvaraqlar bo'yicha operatsiyalarni to'xtatib qo'yish faqat O'zbekiston Respublikasining amaldagi qonun hujjatlarida nazarda tutilgan hollardagina amalga oshirilishi mumkin;
- 5.2.6. Bank sirini tashkil etuvchi ma'lumotlarning himoyasini ta'minlash, Omonatchi va omonat to'g'risidagi ma'lumotlarni uchinchi shaxslarga faqat amaldagi qonun hujjatlarida belgilangan hollarda va tartibda taqdim etish;
- 5.2.7. Ushbu Ofertaga, shuningdek, Bank tariflariga o'zgartirishlar kiritilgan taqdirda, bularni o'zining rasmiy veb-saytida joylashtirish - www.tengebank.uz;
- 5.2.8. O'zbekiston Respublikasining amaldagi qonunchiligiga muvofiq boshqa majburiyatlarni, shu jumladan Omonatchi oldidagi majburiyatlarni bajarish.

6. TOMONLARNING JAVOBGARLIGI

- 6.1. Tomonlarning Oferta bo'yicha o'z majburiyatlarini bajarmaganligi yoki lozim darajada bajarmaganligi uchun Oferta shartlarini buzgan tomon O'zbekiston Respublikasining amaldagi qonunchiligida belgilangan tartibda javobgarlikka tortiladi.

6.2. Omonatchi quyidagilar uchun javobgar bo'ladi va xavfni o'z zimmasiga oladi:

- 6.2.1. Masofaviy bank xizmati orqali Omonat va uning bo'yicha amalga oshirilgan operatsiyalar to'g'risida olingan ma'lumotlarning saqlanishini ta'minlash;
- 6.2.2. Masofaviy bank xizmati orqali Omonat mablag'larini tasarruf etish huquqini beruvchi ma'lumotlarning (login, parollar, PIN-kodlar) xavfsizligi va maxfiyligini ta'minlash, shuningdek, Omonatchining ushbu ma'lumotlarning xavfsizligi va maxfiyligini ta'minlash talablariga rioya qilmasligi natijasida yuzaga kelishi mumkin bo'lgan zararlar;
- 6.2.3. Omonatchining qasddan yoki ehtiyotsizligi oqibatida boshqa shaxslarning ushbu Oferta bo'yicha Bank tomonidan ko'rsatiladigan masofaviy xizmatdan noqonuniy foydalanishi va bunday noqonuniy foydalanish natijasida yuzaga kelgan barcha oqibatlar.

6.3. Bank quyidagilar uchun javobgar emas:

- 6.3.1. Mijozning manzili va/yoki telefon raqamlari, shu jumladan mobil telefon raqami, familiyasi, ismi yoki otasining ismi o'zgarganligi, shaxsini tasdiqlovchi hujjat almashtirilganligi to'g'risida o'z vaqtida xabardor qilinmaganligi natijasida masofaviy xizmat ko'rsatishning to'xtatilishi yoki bank sirini tashkil etuvchi ma'lumotlarning oshkor qilinishi;
 - 6.3.2. Agar Omonatchi yoki uning huquqiy vorisi ishonchnomaning amal qilishini to'xtatish to'g'risida Bankni o'z vaqtida yozma ravishda xabardor qilmagan bo'lsa, Mijoz nomidan amalga oshirilgan operatsiyalar;
 - 6.3.3. Omonatchining mobil telefoni begona shaxslar qo'liga tushib qolgan hollarda, boshqa shaxslar tomonidan MBX orqali ruxsatsiz amalga oshirilgan operatsiyalar;
 - 6.3.4. Omonatchi tomonidan MBXga kirish uchun login va parolning boshqa shaxslarga oshkor etilishi;
 - 6.3.5. Omonatchining MBX hisobiga ruxsatsiz kirish natijasida yetkazilgan moliyaviy va/yoki boshqa turdagi zarar;
 - 6.3.6. Omonatchining ehtiyotsizligi, qasddan qilingan harakati yoki harakatsizligi oqibatida uchinchi shaxslar tomonidan amalga oshirilgan va Omonatchining moliyaviy yo'qotishlariga olib kelgan/keladigan operatsiyalar;
 - 6.3.7. Mijozning xalqaro iqtisodiy sanksiyalar va taqiqlarga, shu jumladan vakil bank tomonidan qo'yilgan talablarga rioya qilmasligi natijasida to'xtatilgan yoki muzlatilgan operatsiyalari;
 - 6.3.8. Omonatchi tomonidan MBX login/parolini oshkor qilinganligi, Omonatchining mobil telefon raqamidan boshqa shaxslar foydalanganligi va MBXga ruxsatsiz kirishning barcha holatlari to'g'risida yozma ariza taqdim etilgunga qadar Omonat bo'yicha ruxsatsiz amalga oshirilgan operatsiyalar;
- 6.4. Bank tijorat banklarida jinoiy faoliyatdan olingan daromadlarni legallashtirish, terrorizmni moliyalashtirish va ommaviy qirg'in qurolini moliyalashtirishga qarshi kurashish to'g'risidagi qonun hujjatlariga, shuningdek xalqaro iqtisodiy sanksiyalar talablariga muvofiq majburiyatlarni to'liq yoki qisman bajarishdan bosh tortgan, shu jumladan Omonatchining operatsiyalarini to'xtatib qo'ygan hollarda javobgarlikdan ozod etiladi;
- 6.5. Tomonlar ushbu Oferta bo'yicha majburiyatlarni to'liq yoki qisman bajarmaganlik uchun javobgarlikdan ozod etiladi, agar tegishli bajarish yengib bo'lmaydigan kuch holatlari, ya'ni mavjud sharoitlarda favqulodda va oldini olib bo'lmaydigan vaziyatlar, tabiiy sharoitlar tufayli, O'zbekiston Respublikasi Hukumatining qarori asosida majburiyatlarni bajarish muddati kechiktirilganligi (moratori) sababli, yoki tegishli munosabatlarni tartibga soluvchi qonun yoki boshqa hujjatning amal qilishi to'xtatilganligi oqibatida mumkin bo'lmasa.

7. BOSHQA SHARTLAR

- 7.1. Ushbu Ofertadan yoki u bilan bog'liq holda kelib chiqishi mumkin bo'lgan barcha nizolarni tomonlar ikki tomonlama muzokaralar orqali hal qilishga harakat qiladi. Agar tomonlar kelishuvga erisha olmasa, ular o'rtasidagi nizo O'zbekiston Respublikasining amaldagi qonunchiligida belgilangan tartibda da'vogar joylashgan hududdagi umumiy yurisdiksiya sudida ko'rib chiqiladi.
- 7.2. Omonatchi Bank operatsion kunining muddatlari haqida xabardor qilinadi. Agar operatsiya Masofaviy bank xizmatlari orqali operatsion kun yopilgandan so'ng amalga oshirilsa, Omonat bo'yicha operatsiya

keyingi operatsion kunda aks ettirilishi to'g'risida ma'lumot beriladi.

7.3. Ushbu Ofertada ko'zda tutilmagan hollarda, tomonlar O'zbekiston Respublikasining amaldagi qonunchiligi talablariga amal qiladi.

7.4. Ushbu Oferta Mijoz/Omonatchi tomonidan qabul qilingan kundan boshlab kuchga kiradi va Tomonlar ushbu Oferta bo'yicha barcha majburiyatlarni to'liq bajargunlariga qadar amal qiladi.

8. BANKNING MANZILI VA REKVIZITLARI

"Tenge Bank" ATB

Manzil: Toshkent shahri, Yashnobod tumani,

Parkent ko'chasi, 66-uy

MFO: 01176, STIR: 207297973

Aloqa markazi raqami: 1245

3-ilovaga 1-shakl
"Tenge Bank" ATBda "Jismoniy shaxslarning omonat
operatsiyalarini amalga oshirishning asosiy
shartlari va tartibiga qo'shilishning ommaviy
ofertasi"

TALAB QILIB OLINGUNCHA OMONATINI OCHISH TO'G'RSIDA ARIZA

(bank nomi)

(vakolatli shaxsning F.I.Sh. va lavozimi)

_____ dan

(ariza beruvchining F.I.Sh.)

ARIZA

_____ da talab qilib olinguncha omonat ochishingizni so'rayman
(valyuta nomi) nomiga

_____ nomiga
(familiyasi, ismi, otasining ismi)

N-sonli hisobim bo'yicha operatsiyalarni amalga oshirishda majburiy bo'lgan imzolimning (men vakolat bergan shaxs imzosining) namunasini taqdim etaman

_____ Omonat shartlari, oferta va Universal shartnoma bilan tanishib chiqdim.



Sana "___" _____ 20___ y.

(hisob egasining imzosi)

BANK QAYDLARI

Hisob ochish hujjatlarini tekshirdi:

Menejer

(imzo)

_____ da talab qilib olinguncha omonat ochishga ruxsat beraman
(valyuta nomi)

(Vakolatli shaxsning F.I.Sh. va lavozimi)

(imzo)

Hisob "___" _____ 20___ yilda ochildi.

Hisob raqami _____

Boshqa qaydlar _____

3-ildavaga 2-shakl

**"Tenge Bank" ATBda "Jismoniy shaxslarning omonat operatsiyalarini
amalga oshirishning asosiy shartlari va tartibiga
qo'shilishning ommaviy ofertasi"**

JAMG'ARMA/MUDDATLI OMONAT OCHISH TO'G'RSIDA ARIZA

(bank nomi)

(vakolatli shaxsning F.I.Sh. va lavozimi) dan

(ariza beruvchining F.I.Sh.)

ARIZA

Men, _____, Sizdan _____
(ariza beruvchining F.I.Sh.) (muddatli/jamg'arma)

omonatini _____
(omonat nomi, foiz stavkasi, muddati)

_____ nomiga _____ miqdorida
(omonatchi F.I.Sh.) (hisob raqami)

_____ ochishingizni so'rayman
(summa raqamlar va so'zlar bilan)

Omonat summasini talab qilib olinguncha saqlanadigan depozitimdan o'tkazishingizni so'rayman

(hisob raqami)

Sana " ____ " _____ 20 ____ y.

(ariza beruvchining F.I.Sh. va imzosi)

(Menejerning F.I.Sh. va lavozimi)

(imzo)

(Vakolatli shaxsning F.I.Sh. va lavozimi)

(imzo)